

## Dörfligeischer 1986

Üses Kongrässhuus isch als Bou e miese Lade,  
A allne Orte gsesch se flicke am 'ne Schade,  
Mir chöi nur hoffe, während mir dört das Bänkli singe,  
Ghei is d' Betondechi nid no grad uf d' Gringe !

\*\*\*\*\*

Der Hafner-Bricht, dä seit ganz schlicht: "Me muess gnau kläre,  
Im Bärner Rathuus git's e grossi Finanzaffäre."  
Als Dörfligeischer dörfe mir üs halt erfräche,  
Und nenne ds Ching bim Name u säge schlicht: Verbräche !

\*\*\*\*\*

Obedüre, hingedüre, zwüshedüre ?  
Wo chönnt me ächt das donners Strössli düreführe ?  
Der Kohler Raoul hett d' Super-Variante groche,  
Und wott das Strossegschtürm grad ungerem See verloche !

\*\*\*\*\*

Üsi Schwyzer Fuessball-Stare hei kei Glück gha,  
Mexico und Wolfisbärg chöi si usem Chopf schla,  
Aber vellech bsinne sich emou die Pflutte,  
Wär wott Wältmeischer wärde, muess halt chönne schutte !

\*\*\*\*\*

Bir Hallebad-Rutschbahn stigt me mühsam ds Stägli ufe,  
Für nachhär mit em 'ne Gutsch Wasser ds Loch ab z' suuse,  
Der Fehr hett se eröffnet, und mir hoffe, dass är verschteit,  
Dass es immer schnäller nidsi, als es obsi geit !

\*\*\*\*\*

Die Sache, wo d' Östriicher mache, sy nid zum lache,  
Si wüsse nüm, dass me Wy us Trube sötti mache,  
Als Näm für dä Fusu-Wy gsächte mir Geischer:  
"Château Antigel" und "Spätlese Sprängmeister" !

\*\*\*\*\*

Zersch isch der 3er Trolley a See abe go chehre,  
Jetzt tuet är nur no vom Bahnhof dür d' Stadt uf Madretsch verchehre,  
Geit's so wyter, beschliesse im Stadtrat no die Weise,  
Pro Tag 'ne drümou ume Chrützplatz ume lo z' kreise !

\*\*\*\*\*

Wär es Hündli hett, darf ds Biel nüm go spaziere,  
Wenn das Tierli schysst, de muesch e Buess riskiere,  
Lööt doch die Viecher das Gschäft im Rathuus-Saal verrichte,  
Näb däm Mischt, wo dört bout wird, cha Hundsdräck nüm viu gwichte !

\*\*\*\*\*

Mir tüe jetzt alli üse Chare verchoufe,  
Für i Usgang näh mir ds Velo oder tüe loufe,  
Denn mir müesse jetzt spare, wie vo euch die meischte,  
Dass mir üs wieder mou es Café Crème chöi leichte !